

Re carta re xutak-a re apóstol San Pablo cha re Filemón

Re nabey tak tzij chin re carta re'

¹Yen Pablo, yinc'o preso roma nintzijojej re ruch'abal re Jesucristo.* Y vichibil re hermano Timoteo tak nakatak-a re carta re' chava rat Filemón. Y camas yatkajo' roma kachibil-ki'* chupan re samaj. ²Nakatak-a ruxnokil-rach re hermana Apia. Y chuka' nakatak-a ruxnokil-rach re hermano Arquipo* kachibil chupan re samaj, y chuka' chique re quiniman chic re Jesucristo re niqumol-qui'* pan avachoch. ³Y can-ta q'uiy utzil xtic'ul chiyixnojel riq'uin re Karta' Dios y re Ajaf Jesucristo. Y chuka' re ivánma can-ta otz nuna' roma iniman chic.*

Re Filemón can rubanon confiar-ri' riq'uin re Jesucristo y chuka' can ye'rajo' re hermanos

⁴Yen Pablo can nojel tiempo nimban orar pan ave' rat. Y chuka' nojel tiempo nintioxij* cha re nu-Dios avoma rat Filemón, ⁵roma yen can nc'axan-va che rat can yajovan* y can abanon confiar-avi' riq'uin re Ajaf Jesús y quire' chuka' naban quiq'uin re je rajc'ual chic re Dios. ⁶Yen ninc'utuj cha re Dios,* roma rat abanon confiar-avi' riq'uin reja', xa roma quire' abanon xtitz'et-ta coma re hermanos che camas q'uiy utzil kac'ulun konojel re kaniman chic re Cristo Jesús pa tak kánma. Can-ta nibanataj jun utzulaj samaj roma abanon confiar-avi' riq'uin re Dios. ⁷Hermano Filemón, nc'axan che camas ya'jo' re je rajc'ual chic re Dios. Xa roma camas ya'jo', jare' re nibano chique reje' che camas ye'qui'cot pa tak cánma. Y mare' yen chuka' camas yinqui'cot pa vánma.* Can acukuban-va nuc'o'x.

* Ef. 4:1; 2 Ti. 1:8. * Fil. 2:25. * Col. 4:17. * Ro. 16:5; 1 Co. 16:19. * Ef. 1:2.

* Col. 1:4; 1 Ts. 1:2; 2 Ts. 1:3. * Ef. 1:15; 1 Jn. 3:23. * Fil. 1:9. * 2 Co. 7:13; 2 Ti. 1:16.

Re Pablo nuc'utuj jun utzil cha re Filemón

⁸Mare' yen, astapa' can c'o autoridad yi'on pa nuk'a' roma re Jesucristo, pero man nincusaj-ta chin che nimbij chava re andex ruc'amon che naban viq'uin. ⁹Yen ntaman che rat camas yajovan, mare' ninc'utuj jun utzil chava. Rat ataman che yen xa yin re'j chic, y can ataman chuka' che vocame yinc'o preso * roma nintzijoj re ruch'abal re Jesucristo. ¹⁰Yen ninc'utuj jun utzil chava roma re Onésimo. * Roma astapa' yen yinc'o preso, reja' xunimaj re Jesucristo, y mare' xoc ancha'l vajc'ual. *

¹¹Y tak rubanon can, reja' man jun xoc-va chava rat, roma xatruya' can. Jac'a vocame camas ndoc chua yen, y xtoc chuka' chava rat. ¹²Y nintak-a aviq'uin. Y ninc'utuj jun utzil chava che jabal ruc'ulic tabana', y chuka' tabana' cha, che can ancha'l che ja yen re yinapon aviq'uin. ¹³Yen ninjo' che re Onésimo nic'ue-ta viq'uin* chin yinruvilij* vova' re anche' yinc'o-va preso, pan aq'uixel rat, roma rat man yatiquir-ta yac'ue' viq'uin. Rat can ataman c'a che yinc'o preso roma nintzijoj re utzulaj ch'abal chin re Dios re nibex evangelio cha. ¹⁴Pero man ninjo-ta nimbij cha che can tic'ue' vova' viq'uin, roma reja' asamajel rat. Y c'aja-na rat xcabin vo xa nic'ue' can vova' viq'uin o manak. Roma c'aja-na pan avánma rat xtalax-va-pa, * y man roma-ta che ja yen yinc'utun chava. ¹⁵Y q'uiba' re Onésimo tak xel-pa aviq'uin jun ca'e-oxe' k'ij, man rion-ta cosas re man otz-ta xuc'am-pa* chava, roma vocame xtitzolaj chic jun bey aviq'uin, chin nojel tiempo. ¹⁶Tak xel-pa aviq'uin, c'amaje-na toc hermano che', xa c'a choj jun a-mozo. Jac'a vocame can hermano* chic. Yen camas ninjo' reja', jac'a rat can xtajo' c'a más, man xe-ta roma reja' a-mozo,* man chic quire-ta, rat can xtajo' chuka' roma can runiman chic re Ajaf.

¹⁷Vo xa junan kavach aviq'uin,* tac'ulu' c'a jabal re Onésimo, can ancha'l che ja yen re yinac'ul. ¹⁸Y vo xa c'o jun cosa re man otz-ta rubanon can chava, o vo xa c'o ruc'as aviq'uin, tabij chua, y yen xtintoj chava. ¹⁹Roma yen Pablo can nintz'ibaj-a chava che can xtintoj-va re ruc'as, astapa' ntaman che rat c'o jun namalaj ac'as viq'uin, roma xintzijoj re ruch'abal re Dios chava. ²⁰Y rat animan chic re Ajaf. Mare' ninjo' che naban-ta re jun utzil re xinc'utuj-yan chava, che otz tac'ulu' re Onésimo. Y riq'uin re' xquinqui'cot pa vánma,* roma vo xa xtaban quire', can nik'alajin che jabal atzekelben re Jesucristo.

²¹Yen xintz'ibaj re carta re' chava roma can nbanon confiar-vi' aviq'uin che can xtaban re xinc'utuj chava.* Y man xe-ta re utzil re' xtaban, xa can ntaman che xtaban más. ²²Y chuka' c'o jun chic cosa ninjo' ninc'utuj

* 1 Ts. 2:6. * Ef. 3:1. * Col. 4:9. * 1 Co. 4:15; Ga. 4:19. * 1 Co. 16:17. * Fil. 2:30.

* 1 Cr. 29:17; Sal. 110:3; 2 Co. 8:12; 9:7; 1 P. 5:2. * Gn. 45:5, 8; Ro. 8:28.

* Mt. 23:8; 1 Ti. 6:2. * Ef. 6:5-7; Col. 3:22. * 2 Co. 8:23. * Flm. 7.

* 2 Co. 2:3; 7:16; 8:22.

chava, che tacanoj-apon jun vachoch, chin che tak xquinel-a libre yinapon chila' aviq'uin. Roma yen can nyaben chic che re Dios can xtuban quire', ancha'l re ic'utun cha pan i-oración.*

Ja ruq'uisibal tak ch'abal cha re carta re'

²³Re hermano Epafras* re c'o viq'uin vova' anche' yinc'o-va preso roma nutzijoj ruch'abal re Jesucristo, nutak-a ruxnokil-avach. ²⁴Y quire' chuka' re hermano Marcos,* re Aristarco,* re Demas* y re Lucas* re je vichibil pa samaj niquitak-a chuka' ruxnokil-avach.

²⁵Y can-ta q'uiy utzil xtic'ul chiyixnojel riq'uin re Kajaf Jesucristo. Amén.*

* 2 Co. 1:11. * Col. 1:7. * Hch. 12:12. * Hch. 19:29. * Col. 4:14. * 2 Ti. 4:11.
* Ga. 6:18.